



# Kwakkerte - Kroniek

*Leef Kwakkerte, Kwekerkes en Koeleköp*

*VV de Kwakkert veertj aankomendj vastelaoves-  
sezoen zien 5 x 11 jaorig bestaon. Eine mijlpaol  
woeë wae gaer effe bie stil wille staon.*

*De aankomendje waeke kintj gae in 't Heitser  
Blaedje eine trökblik op 55 jaor vastelaovendj  
verwachte, de Kwakkerte-Kroniek.*

## Äöver vreuger ....., 1957

Zoeë-as gezag, vääol advertenties inne gezèt oet 1957, de aodste gezèt die wae in ós archief höbbe. Sommige vanne óngernemers die toendertied adverteerdje, zeen d'r mieër as 50 jaor later nog steeds, zoeë-as Janssen vleiswaren (*väör fijne vleisware en prima bedening*), Peskens bekkerie (*väör lekker fla, reziene mik en keek*) en bekker Bongers (*taertjes, vaetjes en knapkook*).

In de "wis tich ..." rubriek waere ein paar puntje geneumdj die mieër as 50 jaor later nog steeds aktueel zeen. In de "wis tich ..." van 1957 steit bevöörbeeldj:

*det de Heitser Voetbalclub Kampioen meintj te waere*

*det d'r eigenlijk nog vääol te weinig publiek geit kieke nao einne voetbalwedstrijd*

*det de plaats woeë de jónglui zich nog al ins ophaoje nao aaflaop van danse en zoeë, noe oppe aaj Trambaan is (blikbaar waas d'r toen ouch al ein hangplek !!)*

*det de Harmonie dit jaor op concours wiltj gaon (WMC missjien ??)*

't Programma mèt de vastelaovesdaag waas toendertied gèt kleiner as noe mèr waarsjienlik aeve drök want wae laeze:

### PROCLAMATIE

*Wai, Sef den Ieërste, Prins Canaval 1957 van Klein Peries en de Vastelaovendj*

*Commandeur in de Orde van de Meubelpin en de Houtworm,*

*Officier van 't Bevenlandsbaikske,*

*Hieër van 't Aoreven en waat drin en drom zitj,*

*Ridder in de Orde van de Kousebinjel,*

*Graaf van de Kemp tot aan de Meule, 't Kepelke toet aan Petrolsties en den truk,*

*Beschermeling van alle maidjes tot 50 jaor, böve de leeftijd durftj hai 't neet*

*mier op zich te neme, omdat hai der geine knecht op noa kan hoaje,*

*Groewtvorst van de Dolgaard, 't Vên, Klein Koelegaot enne Vissestert enz. enz.*

*Verordenere van Prins Sef den Ieërste:*

*Zo as wai in euverlik met 't bestuur en de Raod van Ellef in ein boetegewoon zitting hubbe vastgelagdj:*

- 1. Det wai bie besloet van 't Bestuur der Vasteloavereiniging "De Kwakkert" Sjra de Twiedje opvolge.*

*"Vastelaoveszunjig óm 5 oere trèktj de road van ellef mèt de prinsekapel oet óm ein wanjeling door 't dörp te haoje en hie en dao ins nao binne te gaon".*

Op vastelaovesmaondjig trèktj óm half drie de "Groeëte Kinjeroptocht". Nao aafloop trèktj de Raod van Ellef mèt de Prins oet óm zich ens efkes te laote kieke.

Toet slot, ouch in de gezèt van 1957 steit de proklematie vanne Prins prominent oppe vöörpagina; de proclamatie van Prins Sef den Ieërste.

Waertj vervolgdj